

Нылпиосты визьнодан

# Кызы будэтоно умой адямиез?

Яра-а пиналэз чабкылыны?

Иже вуыліз Москваысь тодмо писатель, драматург но психолог, **Семьялы но пиналлы социально-психологической юрттэт сётонья фондэз кылдытись, «Институт демографической безопасности» огазьясконлэн кивалтйсеэ Ирина Медведева.**

— Ирина Яковлевна, тй артпедагогёслэн но арттерапевтёслэн калыккусо огазьясконэнызы но кивалтйськоды. Маин выриськоды?

— Секыт сямом пинальёсын (укыр керзег, мултэс востэм, вераськисьтэм) ужаско, кудьёссэ больницаын эмьяны вазь на, но психологлэн юрттэтэз солы но анай-атаезлы кулэ ни. Артпедагогика но арттерапия — со пиналэз творчествоен йёнотон. Керетись, бёрдйсь, могасть, керзег пинал мукет адямиосын кусып тупатыны, ассэ валаны-дуньяны мед быгатоз шуыса. Мон кема дыр чоже ужамын больницаын. Тодйсько, кыче кышкало пинальёс но бадзымьёс «психолог» кыллэсь. Соос та кыллэн нырысетй люкетаз («псих») канжасько ни. Соин ик мон доры консультацие лыктйсь анай-атайёс нылпизылы шуо: мынйськом эскерыны, кыче тон артист. Котькуд адями возьдаське тодмотэм, вьль интыын. Нош вань сыче нылпиос, кудьёсыз весь возьдасько, йырзэс лэзьыса ветло, урокын но вераськыны уг дйсьто, дышетйсьлэн юанэзлы валэктон тодо ке но. Сычюослы психологлэн юрттэтэз кулэ.

— **Кызы пичи артистэз эскериськоды, тйляд ужан кабинетты театр выллем?**

— Шуом, лыктэ приёме мултэс востэм, возьдаськись пияш. Со йырзэ но уг жуты. Мон шуисько, тон зэмос театре лыктйд. Катанчи сьбырын мунёос вань. Басьты одйгэ но жуто катанчи йылэ. Мон юан сётъяло, тон вера мунёед интые, зэмос артист сямен, ява. Со бызе катанчи сьбыры но бырье аслыз мунё. Востэм пинальёс чёмысь бырье кионэз. Соос сыче жадиллям ни, лэся, кышканы, лудкеч лулуны. Мунёез жуто но зэмос кион кадь вузо. Бадзымьёс но озы ик ук. Кин зол кесяське но мыжыксэ сэзъя, со кышкась адями.



Тусуктис Борис ГОРБУНОВ

Москваысь психолог, писатель Ирина Медведева мунёос пыр шарае поттэ пиналэсь мылкыдьёссэ, малпаньёссэ.

Висись нылпиосын нырысетй спектакльмы вал «Серая шейка». Валтйсь ролез шудйз 7 аресьем ныл. Анаез солэн лулсэр висёнэн курадзё вал, психбольницаысь оз поталля. Дыдыез будэтйз мумизлэн сузэрэз — лек, чурит нылкышно, школаын завучын ужам адями. 7 аресозь вераськисьтэм ныл, спектакль бере кутскиз лабыртыны, ымзэ ворсаллятэк. Сокема шыпыт улыса, сыче жадем, лэся...

— **Туала вакытэ трос-а керзег нылпиос?**

— Керзег нылпиос но, анай-атайёс но трос. Но улон

Шундыпуксён палась куньёс сое ас вылазы зол шодо ни.

Туэ трос йонтэм (агрессивной) нылпиос. Соос сокем выемын ни виртуальной дуннее, ураме потыса, эшгёсынызы туп чыжамзы уг поты. Нош таза кужым (энергия), уката ик пиослэн, потыны кулэ урамын-азбарын, войнаен яке волейболэн, хоккеен, футболэн шудыса. Анай-атайёс асьсэос пинальёслэн киязы телефон, планшет сёто ук. Ужысь жадьыса берто, тэшкылызы медаз ёрты шуыса, лэзё Интернетын пукыны. Нош нылпиен шудоно, вераськоно, юалляськоно, со возьма саклыкёз. Но огпол-кык пол

Эрказьяськись тэшкылы кулэ тйлесьтыд «эны» шуэмдэс, но уг вала малызэ, со оз на кисьма. Сыче дырья огпол чабкыны, сэреге султытыны яра.

ведь со зарезь кадь. Нош тулкымьёстэк зарезь луэ шат? Нылпиос тулкымьяськыны кулэ, со понна мугъёс вань ке. Но кукке керзегьяськонэз уг ортчы, пинал эшшо но аляк, йонтэм луэ, соку ини вазиськоно психологлы. Пиналды жыны нунал Интернетын пукке ке, со озы ик сьолмаськытыны кулэ. Интернет туж бадзым кышкытлык вае нылпи психикалы. Со чылкыт нылпи лул-сьолэмез сапта, визьзэ сура-пожа. Вотэсын сексуализация мынэ, порносайтёс усьтйсько, отчы уд ке но пыриськы. Со калыклэсь лыдзэ быдтон амал.

тйляд дырды яке зигарды оз тырмы но, со дышиз телефонэн шудыны. Вотэсэн вераськоно овёл ук, уката ик востэм пинальёс талы чаляк дышо. Но! та туж бадзым янгыш но кышкытлык. Азбарьёс пинальёсын тырмемын луыны кулэ. Соос урамын мед шудозы, бызьылозы, мугор но лулсэр таза-лыкёз утён понна со туж умой. Дорам консультацие лыктйсь анайёслэсь но юасько, пиналды урамын шудэ-бызьылэ-а? Тодйськоды-а, мар соос шуо?

— ???

— «Педофил» кылэз таре ваньзы тодо ук, урамын, пе,

кышкыт. Совето вакытёсы мон ужай психиатрической нылпи больницаын. 1980-тй арёслэн шоразы «педофил» кылэз странаымы тодо вал прокурорьёс но психиатрьёс гинэ. Мукетёслэн соос сярись кылэмзы но ой вал. Но педофилёс сярись вераньгожъяны кутскизы, потйзы передачаос, кинофильмёс, спектакльёс... Вань «ворсам» темаос, кудьёссэ усьтыны ваньмызы уг яра. Педофилия — со кышкыт висён, кышкыт йыруж. Куд-ог воргороньёс татчыозь уг но тодо вал, пушказы со курдыт висёнлэн тысез пукке шуыса. Со сярись шара вераны (суицид сярись сямен ик) уг яра, специалистёс гинэ та черен ужаны кулэ.

— **Анай-атайёслэн кыче юанзы тйледыз паймытэ?**

— Кызы будэтоно пиналэз, со азьветлйсь яке кивалтйсь мед луоз шуыса? Та юан дэймытэ. Мыным потэ, анай-атайёс ас аязы мукет ужпум пуктыны кулэ — кызы жеч адямиез будэтоно. Нош луоз-а со кивалтйсь яке уз-а, тросэз потэ пиналлэн сямьы, тодон-валанэз но уно пёртэм мугъёс бордысь. Уг яра нылпиез дышетыны, эшгёссэ гырпумьёсыныз донгаса, азылань мыныны. Зуч культураез учконо ке, азьветлйсь адями — со мукетёссэ кылзыны, котькинлы юрттыны тыршись визьмо мурт. Али та кыллэн пуштроез воштйськемын, уката ик — шундыпуксён куньёсын. Соин ик бадзымьёс, кудьёсыз шуо

пинальёссылы: тон одно ик вормыны кулэ та конкурсын, тон одно ик нырысетй инты басьтыны кулэ чюшатсконын, тон одно ик «5»-лы гинэ дышетскыны кулэ, сыче анай-атайёс нылпи неврозьёсты кылдытонья фабрикалы пёрмо. Таچه кылёсын пинальёсты будэтон — соослэсь психиказэз тйян. Ведь вераны но пёртэм сямен луэ. «Умой дышетскы, азылань бадзым адями луон понна» яке «Умой дышетскы, пие, визьмо мед луод но адямиослы юрттыны мед быгатод шуыса». Пёртэмлыкёс валаськоды, луоз?

— **Тросэз мумыос-бубыос жожтйсько, пинальёссы уг кылзйсько шуыса.**

— Нылпиос анай-атайёссылэсь кышкамысь дугдызы. Али асьмеос соослэсь курдаськом. Мар люкетэ тышкаськыны урамын матькетйсь нылпиосты? Тросэз бадзымьёс кылымтэ улсы кариськозы но азылань мынозы. Уго уг поты керзегьяськемзы, мылкыдзэс куашкатэмзы. Асьмеос но янгыш, жуг-жаген тырмем Интернет но.

Куд-ог мумы-бубыос кылзйськисьтэм пиналэз кылымтэ-адзымтэ улсы карисько. Соин вераськытэк улон, бойкот — пинал понна туж секыт, сое туж бадзым йыртэман понна гинэ анай-атай уже кутыны быгатэ. Али тросэз шуо: уг яра пинал борды чиньыдэ но йоттыны, кылын валэктоно. Таچه малпан — янгышан. Нылдэс яке пидэс небыт интыяз чабкон — со тужгес лякытэз визь тырон ай. Бен, пинал бёрдэ, кётыз жож луэ, куатаське... Но со вала, озы карыны уг яра ни шуыса. Тэшкыли йыртэмаз чюкна, нош сое чабкызы ке жытазе, атаез ужысь бертэм бере, бен, соку уз вала, мар понна вуиз тыш. Кыл кутон луыны кулэ йыртэмаме бере ик, сыче дырья пинал вала, мар понна солы сюрюз.

Татын но лыдэ басьтоно нылпилэсь сямзэ. Куд-огезлы тырме йыртэмаме бере шораз урод учкыса но, нош куд-огезлы 100 пол вералод, со уз вала. «Со юри оч каре мыным», — жожтйсько анайёс кылзйськисьтэм пиналзы вылэ. Овёл, со юри озы уг кары, мон али психоанатомиез тодйсь специалист сямен верасько. Йырвиымысь люкет, кудйз гожтэм но верам кылэз валан понна асьмелы сигнал сётэ, «кисьма», адямины 21 арес тырмытозь. Соин ик эрказьяськись тэшкылы кулэ тйлесьтыд «эны» шуэмдэс, но уг вала малызэ, со оз на кисьма. Сыче дырья огпол чабкыны, сэреге султытыны яра. Тодады вае ай, мар верало вал гуртын улйсь песяйёсмы: «Пиналдэ чабкылы, зус вамен тэрытозяз». Гуртысь зусьёсты мон тодйсько ай, отчы 6-7 аресозь нылпиос вамен тэро. Матькетэ пиналды — чабке, верам кылэз уг вала бере. Сое дугдытоно ук, асьмеос адямиез будэтйськом — йыртэмасез ум.